

S A M Þ Y K K T

um lokunartíma sölubúða og sölustaða í Siglufirði.

1. gr.

Sölubúðum í Siglufirði skal lokað eftir því, sem ákveðið er í 2. og 3. gr. samþykktar þessarar. Sama gildir um sölustaði, þar sem innlendir varningur er hafður á boðstólum til sölu og hans ekki neytt á staðnum.

2. gr.

Alla virka daga skal sölubúðum og sölustöðum eigi lokað síðar en kl. 18, nema laugardaga, en þá skal lokað kl. 13, og þær eigi opnaðar aftur fyrr en kl. 9 árdegis næsta virkan dag. Þó skulu vera frá þessu undantekningar, sem nú skal greina:

Síðasta virkan dag fyrir aðfangadag jóla er heimilt að halda sölubúðum opnum til kl. 24, svo og er heimilt að hafa sölubúðir opnar til kl. 22 einn virkan dag á undan þessum degi, skömmu fyrir jól. Aðfangadag jóla skal eigi lokað síðar en kl. 12. Þriðja dag jóla skulu sölubúðir opnaðar kl. 10 árdegis. Á gamlársdag skal sölubúðum lokað eigi síðar en kl. 12 á hádegi. Laugardag fyrir páska og hvítasunnudag skal sölubúðum lokað eigi síðar en kl. 13. Sölubúðir skulu vera lokaðar alla helgidaga, sumardaginn fyrsta, 1. maí, 17. júní og fyrsta mánudag í ágúst (frídagur verzlunarmanna), laugardaginn fyrir frídag verzlunarmanna og 1. desember skal sölubúðum lokað kl. 12 á hád.; 20. maí, þá er afmæli Siglufjarðar ber upp á 5 eða 10 ár, skulu sölubúðir vera lokaðar allan daginn.

3. gr.

Frá ákvæðum um lokun sölubúða í samþykkt þessari, skulu enn fremur vera þessar undantekningar:

Brauða- og mjólkurbúðum má halda opnum eins og öðrum verzlunum og auk þess almenna helgidaga og þá daga, sem sölubúðir skulu vera lokaðar samkv. 2. gr., frá kl. 10 árdegis til kl. 12 á hádegi. Laugardaginn fyrir frídag verzlunarmanna skal lokað eigi síðar en kl. 12 á hádegi. Lokað skal vera á jóladag, nýársdag, páskadag, hvítasunnudag og frídag verzlunarmanna.

Ákvæði í 2. gr., um að halda megi búðum opnum til kl. 22 og 24 fyrir jól, tekur ekki til brauða- og mjólkurbúða.

Ákvæði samþykktarinnar ná ekki til lyfjabúða, þeim er þó eigi heimilt að selja eftir lokunartíma sölubúða nokkurn þann varning, sem ekki má selja samkvæmt verzlunarleyfi.

4. gr.

Bæjarráð getur leyft að vikið sé frá ákvæðum lokunartíma sölubúða, þegar um er að ræða:

- Verzlanir, er selja varning beint út á götu, t. d. gegnum söluop, eða hafa sérstakt leyfi bæjarráðs og heilbrigðisnefndar til að verzla með takmarkaðan fjölda vörutegunda.
- Veitingastaði, er samkvæmt sérstöku leyfi bæjarráðs selja vörur, sem ekki er ætlað að neyta á staðnum. Undanþegnir gjaldi samkvæmt síðustu málsgrein eru þeir veitingastaðir, sem selja heitar máltíðir, enda sé sú starfsemi meginhluti rekstrarins, að dómi heilbrigðisnefndar.

Í verzlunarstöðum þessum má selja þann varning, er heilbrigðisnefnd samþykkir hverju sinni, og er umbúnaður þeirra og fyrirkomulag allt háð samþykki

lögreglustjóra og heilbrigðisnefndar. Sala á þessum stöðum má fara fram frá kl. 8—23.30 á virkum dögum og á helgum dögum frá kl. 15—23.30. Þó skal lokað föstudaginn langa, páskadag, hvítasunnudag, aðfangadag jóla og jóladag, samkvæmt því sem segir í 4. gr.

Bæjarráð getur sett nánari reglur um leyfi til verzlunarreksturs skv. þessari grein og getur bundið hann öllum þeim skilyrðum, er það telur nauðsynlegt, m. a. greiðslu árlegs gjalds í bæjarsjóð fyrir hvert leyfi, og má innheimta það með lögtaki.

5. gr.

Eftir lokunartíma sölubúða og sölustaða er óheimilt að selja á strætum og torgum eða annars staðar utan sölubúða og sölustaða, nema úr sjálföldum, nokkurn þann varning, sem ekki má selja nema samkvæmt verzlunarleyfi.

6. gr.

Menn, sem komnir eru inn í sölubúð fyrir lokunartíma, er heimilt að afgreiða eftir að lokað er. Heimilt er að selja bátum eða skipum eftir lokunartíma veiðarfæri, kol, olíu, vistir og aðrar nauðsynjar, svo og bifreiðum benzin og olíu.

7. gr.

Lögreglustjóra er heimilt, þegar sérstaklega stendur á, að veita undanþágu frá samþykkt þessari fyrir einstaka daga og til að sala fari fram í góðgerðarskyni, eða til ágóða fyrir einstakar stofnanir eða fyrirtæki, sem að dómi lögreglustjóra horfa til almenningsheilla.

8. gr.

Brot gegn samþykkt þessari varða sektum frá 200.00—1000.00 krónum og renna sektirnar í bæjarsjóð Siglufjarðar. Mál út af brotum gegn samþykkt þessari skal reka sem almenn lögglumál.

Samþykkt þessi, sem er gerð af bæjarstjórn Siglufjarðar samkvæmt lögum nr. 17 1. febrúar 1936, staðfestist hér með og birtist til eftirbreytni öllum þeim, sem hlut eiga að máli.

Jafnframt er úr gildi felld samþykkt nr. 39 16. marz 1961, um lokunartíma sölubúða og sölustaða í Siglufirði.

Félagsmálaráðuneytið, 1. október 1964.

F. h. r.

Hjálmar Vilhjálmsson.

Gunnlaugur Þórðarson.

SAMÞYKKT

um sýsluvegasjóð í Gullbringusýslu.

1. gr.

Í Gullbringusýslu skal vera sýsluvegasjóður. Skal úr þeim sjóði greiða kostnað við viðhald og lagningu sýsluvega skv. 2. gr. í samræmi við staðfesta sýsluvegaáætlun, sbr. þó 52. gr. vegalaga nr. 71/1963.